

PRESS RELEASE – Juñu 20, 2014

SEDL Samuel Mendonca halo inaugurasan ba projetu PNDS iha Suku Mota Ulun, Distritu Liquica.

Iha loron 20 de Juñu 2014, Governu Timor Leste liu husi Sekretáriu Estadu Dezenvolvimentu Lokál Samuel Mendonca halo inaugurasan ba projetu PNDS rua maka hanesan projetu sentru komunitário no projetu bé mós iha Suku Mota Ulun, Disitritu Liquica.

Ne'e hanesan inaugurasan ba dala tolu nian hafoin serimónia PNDS iha Distritu Ermera iha loron 18 Juñu, no iha Distritu Manatuto in loron 12 Junu.

SEDL fó parabéns ba ema hotu ne'ebé involve iha projetu PNDS inklui comunidade, Chefe suku no aldeia sira, ekipa PNDS no Administrasaun Distritu Liquisa, no mós dehan: *“Governo Timor Leste prepara osan atu hari konstrusaun ka infraestrutura ne'ebé sai prioridades ba comunidade. Tanba ne'e husu ba comunidade hotu, atu responsabiliza hodi tau matan ba infraestrutura hirak ne'ebé hari tiha ona, tanba ita maka nain ba projeitus hirak ne'e.”*

Projetu PNDS iha Mota Ulun mak parte 'pilotu' ka dala primeiru prosesu PNDS la'o. Maibé Chefe suku Mota Ulun, Augusto de Jesus, afirma katak projetu PNDS sira ne'e hetan partisipasaun no kontribuisaun barak husi comunidade iha aldeia Classo no Mota Ikun, suku Mota Ulun, no laiha dezafiu significativu ne'ebé comunidade sira hasoru durante ne'e tanba buat hotu la' o ho di'ak.

“Ami agradese, tanba comunidade bele asesu ba sentru komunitário ne'ebe hari tiha ona. Nudar autoridade lokál ha'u kontente katak programa ida ne'e bele la'o nafatin durante tinan ualu nia laran, atu nune'e bele hadi'ak comunidade nia moris,” dehan Chefe Suku Mota Ulun.

Reprezentativu husi Embaixada Australia Kathy Richards, mós marka prezensa hodi inaugura facilidade foun ne'e. Governu Australia fó apoiu hodi formasaun ba fasilitador PNDS sira ne'ebé serbisu hamutuk ho comunidade hodi realiza programa hirak ne'e. Iha ninia diskursu iha lia Tetun nia dehan, *“Governu Australia sente orgulhu atu serbisu hamutuk ho Governu Timor-Leste iha programa nasional ida ne'e. Liu husi apoiu Australia ba program PNDS, agora ita bele haree ona ninia rezultadu iha nivel comunidade hanesan sentru comunidade ida ne'e.”*

Programa Nasionál Dezenvolvimentu Suku (PNDS) maka programa governu nian atu hakbiit comunidade iha nivel suku no aldeia liu husi hili no dezenvolve infraestrutura báziku ne'ebé comunidade hakarak atu hadi'a kondisaun sosio-ekonomiku no kria governasaun lokál ne'ebé di'ak. Programa ida ne'e hala'o tiha ona pilotu ba Suku 30 iha Distritu Lima maka hanesan Dili, Liquica, Ermera, Manatuto no Aileu, iha tinan kotuk no agora dadaun remata ona.

Projetu bé mós hala'o iha Aldeia Classo. Projeitu ida ne'e utiliza orsamentu cerca de 21 mill dolares Amerikanu no benefisiu uma kain hamutuk 216. Projetu Sentru komunitário hari iha Aldeia Mota Ikun ne'ebé bele utiliza husi comunidade hamutuk uma kain 124. Projetu ida ne'e gasta cerca de 18 mill dolares Amerikanu.

Kontaktu:

Ekipa Komunikaun Sec PNDS: Duarte dos Santos, duarte.santos@pnds.gov.tl, 78188336.

